

الدرس السادس لسورة العنكبوت

بسم الله والصلاة والسلام على رسول الله ، الحمد لله وكفى وصلاة وسلاماً على عباده الذين اصطفى

اخواني واخواني الله يبارك فيكم الله يحفظكم نحن الآن في اللقاء السادس من لقاءاتنا مع سورة العنكبوت ، وهندأ ندخل في مواضيع خطيرة جداً من نفس الواقع اللي عايشين فيه يا جماعة احنا دلوقت في

"الآية الخامسة " مَنْ كَانَ يَرْجُوا لِقَاءَ اللَّهِ فَإِنَّ أَجَلَ اللَّهِ لَآتٍ وَهُوَ السَّمِيعُ الْعَلِيمُ

احنا قولنا ان شعارنا في هذا اللقاء من جاهد فانما يجاهد لنفسه نبدأ بقى من أول الآية الخامسة " مَنْ كَانَ يَرْجُوا لِقَاءَ اللَّهِ فَإِنَّ أَجَلَ اللَّهِ لَآتٍ وَهُوَ السَّمِيعُ الْعَلِيمُ " يعني ايه " مَنْ كَانَ يَرْجُوا لِقَاءَ اللَّهِ فَإِنَّ أَجَلَ اللَّهِ لَآتٍ وَهُوَ السَّمِيعُ الْعَلِيمُ " ؟ هنا فيه 3 معاني

المعنى الأول " مَنْ كَانَ يَرْجُوا لِقَاءَ اللَّهِ " اللي عايز يموت اللي يتمنى إنه يموت، عايز يموت ليه؟ ممكن من خوفه إنه ميقدرش يصبر على الفتن اللي هو عايش فيها، النبي عليه الصلاة والسلام قال "هياتي على المؤمن زمان يمر على المقابر يقول للميت ياليتي كنت مكانك" ، اللي خايف على دينه يا جماعة في الواقع اللي احنا عايشينه ده بيبقى قاعد مرعوووب هو أنا هقدر أكمل ولا مش هقدر أكمل، طيب هقدر أثبت ولا مش هقدر أثبت، مرة كنت ماشي مع أحد إخواني وهو طول الطريق أنا خايف مثبتش أنا خايف مقدرش أكمل دخلنا المسجد وهو مسك المصحف وقعد يقرأ شوية لقينه جه وقعد جنبني وبيقول أنا حاسس بكمية ثبات لو اتوزع على أهل الأرض يفيض وده من إنه قرأ صفحه في القرآن الكريم " مَنْ كَانَ يَرْجُوا لِقَاءَ اللَّهِ " ده اللي عايز يموت ويبقى غالباً من كتر خوفه من عدم صبره على الفتن ، " فَإِنَّ أَجَلَ اللَّهِ لَآتٍ " هتموت هتموت الموت جاي جاي لكن القضية " وَهُوَ السَّمِيعُ الْعَلِيمُ " يعني ربنا يسمع ما تقول ويعلم ما تفعل ، أنت هتقابل ربنا بإيه؟ أنت جاهز تقابل ربنا ولا لأ! وده أسلوب غضب يا جماعة على المعنى ده يبقى الإسلوب ده غضب ، ياللي بتتمنوا تموتوا هتموتوا لكن و أنت عايش أنت قدمت إيه للدين؟ أنت قدمت إيه للدعوة ؟ قدمت إيه لدينك؟ أوعى تظن إن أنت كافل الدين ! ربنا هو اللي كافلك أنت والدين ، يقولك مثلاً حملة العرش لما يموتوا مين اللي هيحمل العرش؟ الله يحمل العرش وحملة العرش سبحانه وتعالى يبقى ده المعنى الاول " مَنْ كَانَ يَرْجُوا لِقَاءَ اللَّهِ " الموت " فَإِنَّ أَجَلَ اللَّهِ لَآتٍ " الموت جاي جاي " وَهُوَ السَّمِيعُ الْعَلِيمُ .

المعنى الثاني : " مَنْ كَانَ يَرْجُوا لِقَاءَ اللَّهِ " اللي يصدق بيوم القيامة ، اللي عنده يقين، أنتي مصدقه إن فيه يوم قيامة ؟ أنتي مصدقه إن ربنا هيجيب الجابرة والظلمة والحكام الطغاة وهيخليهم زي الحشرات تحت الرجلين ينداسوا؟ أنت مصدق إن ربنا هيجيب كل الظالمين والمتجبرين وأهل الباطل اللي سجنوا أهل الحق ومعذبيهم جوه السجون وربنا هيقفهم وهيتقم منهم لأهل الحق؟ أنتي مصدقه إن بيوم القيامة جاي وربنا هيبعث الناس بعد ما كانوا تراب؟ أنت مصدق؟ " مَنْ كَانَ يَرْجُوا لِقَاءَ اللَّهِ " أنت مصدق إن فيه آخرة ؟ " فَإِنَّ أَجَلَ اللَّهِ لَآتٍ " من باب أولى صدق وعود ربنا في الدنيا ، اللي مصدق وعود ربنا في الآخرة اللي صدق وعود ربنا في الدنيا، زي ما كنا بنقول امتحن صلاتك امتحن صلاتك في الدنيا، امتحن صلاتك وادعي ربنا فيها بتفريج الكربات، طيب لو كرباتك متفرجتش في الدنيا بصلاتك، لو متجوزتيش بسبب

الصلاة لو مأنجزت بسبب قيام الليل، لو ربنا محللكش مشكلتك بسبب الركعتين اللي قمت اتوضيت وصليتهم وتوسلت الى الله فيهم، الصلاة اللي محللكش مشاكل الدنيا هتحل لك مشاكل الآخرة العظيمة؟! مشاكل الدنيا حقيرة ! امتحني صلاتك ، عشان لو لقيت دعاكي ميبستجيش يبقى غالباً صلاتك فيها مشكلة ، صلاتك محتاجة تتراجع، " مَن كَانَ يَرْجُو لِقَاءَ اللَّهِ " اللي مصدق إن فيه يوم آخرة اللي مصدق إن فيه يوم قيامة ، " فَإِنَّ أَجَلَ اللَّهِ لَآتٍ " من باب أولى صدق وعود ربنا ونصر ربنا في الدنيا ، يبقى النصر جاي جاي وعلى هذا المعنى " وَهُوَ السَّمِيعُ الْعَلِيمُ " معناها إنك لما تقعد تقول اللهم اهلك الظالمين طيب الإجابة بتأخر ليه؟ كأن ربنا يقول مهما تأخرت الإجابة وعود ربنا جايه والنصر في الدنيا جاي، او عو لما تدعوا ربنا وتلاقوا الإجابة بالتمكين تأخرت او عوا تتهموا الله سبحانه وتعالى ، فالتأخير لحكمة لا يعلمها إلا الله سبحانه وتعالى .

المعنى الثالث : " مَن كَانَ يَرْجُو لِقَاءَ اللَّهِ " المشتاقون إلى الله، المعنى الثالث ده الشوق الى الله، " مَن كَانَ يَرْجُو لِقَاءَ اللَّهِ فَإِنَّ أَجَلَ اللَّهِ لَآتٍ " يعني ربنا بيعزي المشتاقين إلى رؤيته ، يقولهم هتشوفوني وهتروني بس اصبروا حتى تلقوا الله عز وجل حتى تروا الله سبحانه وتعالى ، النبي عليه الصلاة والسلام لما كان يعدي جنب المقابر ويكلم الاموات ويقولهم " أنتم السابقون وأنا إن شاء الله بكم لاحقون"، يعني ايه " أنتم السابقون وأنا إن شاء الله بكم لاحقون"؟ أنت عارف لما اصحابك يخلصوا امتحان آخر السنة قبلك ويطلعوا على الساحل الشمالي وأنت لسالك امتحانين فتقول هلحقكم إن شاء الله يعني أنت حاسس أنهم سيقوك لحاجة جميلة فالنبي عليه الصلاة والسلام يقول للأموات أنتوا سبقتونا إلى لقاء الله سبقتونا للدار الآخرة، النبي عليه الصلاة والسلام كان يشناق إلى لقاء الله فده تعزیه للمشتاقين .

يبقى " مَن كَانَ يَرْجُو لِقَاءَ اللَّهِ فَإِنَّ أَجَلَ اللَّهِ لَآتٍ " لها 3 معاني

1. إن اللي عاوز يموت سواء خوفاً من الفتن أو اللي عاوز يموت الموت جاي جاي بس أنت اشتغل
2. اللي مصدق إن فيه يوم آخرة يبقى من باب أولى صدق وعود ربنا في الدنيا ، أنت مصدق إن ربنا قادر . إنه يعمل كل اللي قال عليه في آيات الآخرة في القرآن ومش مصدق إن ربنا يقدر ينصر التيار الاسلامي في الدنيا !
3. تعزیه للمشتاقين إلى الله إن لقاء ربنا جاي بس اصبروا واجتهدوا في الأعمال الصالحة عشان تفرحوا . لما تلقوا الله سبحانه وتعالى .

وشفنا إن معنى " وَهُوَ السَّمِيعُ الْعَلِيمُ " اختلف على حسب ال 3 معاني، كل معنى من ال 3 على حسب اختلف معنى " وَهُوَ السَّمِيعُ الْعَلِيمُ " وده من إعجاز القرآن وتنوع معاني القرآن الكريم في الآية الواحدة

" آية 6 " وَمَنْ جَاهَدَ فَإِنَّمَا يُجَاهِدُ لِنَفْسِهِ إِنَّ اللَّهَ لَغَنِيٌّ عَنِ الْعَالَمِينَ

فَإِنَّمَا أقوى أداة حصر في اللغة كلها، يعني ايه " يُجَاهِدُ لِنَفْسِهِ "؟ يعني لما واحد يروح يشتغل في عقد عمل فهو تعبان فواحد يقوله أنت بتشتغل لنفسك ،يعني إيه لنفسك؟ يعني أنت لا تتخيل كمية المكاسب اللي هتجنيها من وراء هذا العمل، أنت مش عارفة صبرك على النقاب في هذه الأيام ثوابه إيه، أنت مش عارف صبرك على إنك تتربى وتوصل لربنا في هذه الأيام شكله إيه، أنت مش عارفة صبرك إنك أنتي تشتغلي في الدعوه إلى الله ، صبرك على إنك تحفظ القرآن، صبرك على طلب العلم وصبرك على طلب

القرآن، مش عارفين ثوابكم إيه بسبب صبركم على اللي أنتوا عابشينه ده، " وَمَنْ جَاهَدَ فَإِنَّمَا يُجَاهِدُ لِنَفْسِهِ " هناخد لنفسك كتير قوي ، أنتي هتاخدي لنفسك رغم إن النفس هي اللي مش طايقة الحبسة بتاعة الدين والتكاليف بتاعة الدين، إنما النفس أكبر مستفيدة في النهاية وأكبر حد هيفرح في النهاية هو نفسك .

وَمَنْ جَاهَدَ يَبْقَى السُّورَةُ بدأت بالكلام عن الجهاد وفي النهاية آخر آية فيها "وَالَّذِينَ جَاهَدُوا فِينَا لَنَهْدِيَنَّهُمْ سُبُلَنَا " بدأت وختمت بالكلام عن الجهاد زي سورة الحج ، فلازم نوطن نفسنا إن الطريق من أوله لآخره . كله جهاد، لازم نوطن نفسنا على الصبر .

وَمَنْ جَاهَدَ فَإِنَّمَا " ومن: مطلقه يعني أبو بكر وأي صحابي كبير "تربيه نفسيه" الكل لازم يتكسر لله ، " . والكل لازم يوطن نفسه إنه هيتعب عشان الله، وطني نفسك إن الطريق ده طريق كفاح وصمود .

وَمَنْ جَاهَدَ فَإِنَّمَا يُجَاهِدُ لِنَفْسِهِ إِنَّ اللَّهَ لَغَنِيٌّ عَنِ الْعَالَمِينَ " ليه ربنا مقالش إن الله لغني عن المؤمنين؟ " العالمين دول شغلوا المؤمنين و شغلوا الملايكة وشغلوا زي ما بقول كده هو ربنا محتاج حملة عرش عشان يشيلوا العرش! طيب لما بيموتوا حملة العرش في أول القيامه مين اللي بيحمل العرش؟ " إِنَّ اللَّهَ لَغَنِيٌّ عَنِ الْعَالَمِينَ " يبقى ربنا غني عن الجميع اوعى تعتقد إن ربنا يحتاج لأحد في أي شيء، كل شيء يحتاج لله في كل شيء، والله لا يحتاج لشيء في أي شيء .

سورة العنكبوت موسوعة مشاكل الملتزمين

هتبدأ السورة تعالج المشاكل اللي مقبلاك في حياتك، المشاكل اللي مقبلاكي في حياتك ، من وأنا طالب في الكليه نفسي اعمل موسوعة مشاكل الملتزمين ليه؟؟ لأن وأنا طالب في الكليه عندي مشاكل ما بين الدراسة وما بين الانطلاق في الدين، مش عارف اجمع ما بين الدين وبين الدراسة كانت أزمة، وأنا في الكليه ممكن أهلي في البيت معترضين على التزامي طيب اعمل إيه في أمي وأبوي ؟ أبرهم إزاي؟ وفي نفس الوقت أشوف ديني إزاي؟ ولما يقولولي منتاش نازل درس اعقهم وإنزل ولا اسمع كلامهم وديني يروح؟ اعمل إيه؟؟ وفي نفس الوقت أنا شاب ملتزم اديلي سنتين ثلاثة لسه جوايا أهواء من بتاعة زمان ولسه معروض عليا معاصي من بتاعة زمان ، طب اعمل إيه في الأهواء اللي موجودة في قلبي والشهوات اللي موجودة في القلب؟ وفي نفس الوقت أنا عايز انطلق في الدين ومش لاقى خط سير، طيب أجب خط سير منين؟ طيب أعرف مراد ربنا مني إزاي ؟ طب أعرف ربنا الأحب ليه إيه إزاي ؟ الدراسة ولا إن أنا اذاكر دين ولا إن أنا اشتغل في الدعوة ؟ مش عارف مراد ربنا مني إيه ، طب انا دلوقتي عايز صحة صالحة أجب صحة صالحة منين؟ أنا عايز صحة تشجعني أنا عايز صحة وبيئة إيمانية بحق وحقيقي عايز حد يشجعني، وفي نفس الوقت أنا شايف الواقع عمال يخطط في بعضه وده بيشتد في ده والجماعة دي بتحارب في الجماعة دي ، هو مين الصح؟ ومين الغلط؟ ولا كله غلط؟ ولا كله صح؟ طيب امشي مع مين؟ طيب اسمع كلام مين؟ مين الصح في دول عشان امشي معاه واسمع كلامه؟ وفي نفس الوقت أهل الباطل بيهددوا الملتزمين واللي بيلتحي بيتحارب، طيب أخاف ولا لأ ولو خفت أبقي منافق ولا مش منافق؟ ؟ وفي نفس الوقت أصحابي القدام بيحاولو يرجعونني ، طب اعمل معاهم ايه؟ طيب أنزل ادعوههم ولا لأ؟ أنا قلبي بيتقطع لما بشوفهم ومكلمهم مش في الدين، وبحس إن أنا مقصر، يا إخوانا الواحد كان عايش في صراع نفسي مهوول، فكان نفسه يبقى في حاجة في يوم اسمها "موسوعة مشاكل الملتزمين" إن الملتزم بيعيش ضغط نفسي مهول، ضغط نفسي جبار في حياته مش عارف يعمل إيه ومش عارف يوصل لربنا إزاي، ومش عارف يتعامل مع المشاكل الموجودة في الواقع، ومش عارف لو وقع في معصية سر يعمل إيه، ومش عارف ماذا يستطيع ان يفعل، سبحان الله العظيم رزقني الله بسورة العنكبوت ولقيت انها موسوعة مشاكل الملتزمين، لذلك هحاول إني وأنا بتكلم معاكم في المشاكل اللي في سورة العنكبوت إن أنا أبقي عملي وأديكم تصور عملي للمشاكل

1. مشكلة الوالدين:

أول مشكلة هتقابلنا دلوقتى مشكلة الأم والأب مشكلة الوالدين طيب ليه ربنا أول مشكلة جات فى السورة هي مشكلة الوالدين؟ لأنهم أكثر ناس بيحبوك، أوعى تفتكري إنهم حبسوكى ورفضوا النقاب أو حاربوك ورفضوا اللحية أو حاربوك فى التزامك أو منعوكى من الدروس أوعى تفتكروا لأنهم بيكرهوكم ، ده هيموتو عليكم ، ده من حبهم فيكم، دول أكثر اتنين بيحبوكم فى الدنيا كلها، فإنتم بالنسبة لهم مشروع عمرهم شوفو كده ربنا بيقول " وَإِنْ جَاهِدَاكَ لِتُشْرِكَ بِي " الجهاد ده حياة أو موت ، أنت بالنسبة لأبوك أو أمك قضية حياة أو موت، أنت مستقبلهم وماضيهم وحاضرهم ، أنتى مشروعهم اللى عايشين عشانه ، . عشان كده سبحانه الله العظيم يعنى الآيات فعلا .

نحاول نتكلم يا جماعة من خلال الآيات فى قضية الوالدين فى قضية نعمل إيه مع مشكلة الأم والأب اللى جت أول مشكلة لأنهم أكثر ناس بيحبونا فأكثر ناس بيحاربونا

الجهاد يعنى قتل وموت يعنى تقتل ! يعنى هما مش متخيلين كميه الخسائر اللى ممكن بتيجى فى حياتنا بسبب حربهم لإلتزامنا ، فاكرين إن هما بيفيدونا ومش عارفين إن هما بيحطمونا ، ومش عارفين إن هما بيقفوا فى طريق أعظم حلم لينا فى حياتنا ، ومش عارفين إن هما بيدمرونا نفسيا ، وبيخلونا ولا عارفين نعمل دنيا ولا عارفين نعمل دين بسبب خوفهم علينا ، يعنى عواطف الأم والأب فى اللحظة دى محتاجة . انها تتقوم اصلا ! ولكن كل ده بسبب خوفهم

طب تعالوا بقى أما نشوف هذه الآيات موسوعة مشاكل الملتزمين تبع ايه يا شباب ؟ انا كلمتكم عن 6 أنواع من التربية قولتلكوا (التربية النفسية والتربية العقلية والتربية الفكرية والتربية الاجتماعية والتربية القلبية والتربية الشخصية الحياتية) ، قولتلكوا خدوا 6 أنواع من التربية الملتزم والملتزمة اللى مش مترى عليهم ده معيرفش يعيش، معيرفش يتجوز معيرفش يدخل فى فريق وعمل جماعى معيرفش يفيد دينه معيرفش يكمل صح ، اللى مش مترى الـ 6 أنواع دول اللى معندوش التربية النفسية اللى تخلق نفسيته عندها صمود وقوة وفى نفس الوقت ثبات مش ذبذبه وفى نفس الوقت مرونة مش اصطدامية ، اللى عقليته واسعة عارف يتعامل مع الحياة ازاي صح ، اللى عنده تربية شخصية شخصية حلوة شخصيتها ناضجة يقدر يكسب الناس ويقود الناس إلى الله ، اللى عنده تربية اجتماعية يعرف بينى أسرة يعرف يربى عيل ، تعرف تقود بيت معاه رخصة قيادة أسرة مش رخصة قيادة عربية ! مش متعلمه فيزيا وكيميا فى المدرسة ومهيش عارفه تتعامل مع جوزها ازاي بتخرب البيت لو حد تزوجها أو هو يخرب البيت .

دى أنواع التربية أنا عايزكو تقولولى الوقتى مشاكل الملتزمين تبع انهى نوع من أنواع التربية يعنى اللى بيكتب الوقت يكتب على الت . التربية الاجتماعية؟ غلط. التربية النفسية؟ غلط. التربية القلبية؟ غلط. التربية الفكرية؟ غلط.

تبع التربية العقلية يا جماعة لأن 90% من مشاكل الملتزمين ده سببها . أصل فيه إخوة قالت التربية القلبية أنتو عارفين أنا من غير ما أعرف هي مين هي عايشة فى بيتها فى دور أحد أحد . أبوها يجى يكلمها أحد أحد يابنتى اقسام بالله معظم مشاكلك مع أمك و أبوكى مشاكل ذكاء مش مشاكل أحد أحد . مشكلة الإخوة عقلية . عقلية التعامل مع مشاكل الحياة أنت أحيانا بتلاقى إنسان فى حياته مشاكل ومع ذلك بيضحك ومبتسم ليه؟ هو عاقل هو فاهم إن لازم الدنيا تعمل فيه كده هو فاهم إنه هيتعامل مع المشاكل بحكمة ، هو فاهم إن المشكلة مش هتتحل بين يوم وليلة ، هو فاهم إن مش حل المشكلة إنى أنكد على نفسى وأحبط نفسى وأحطم نفسى ، وفاهم إن طريقة التعامل مع المشاكل عايزة تركيز وهدوء إنسان عاقل ، معظم مشاكلنا يا جماعة معظم مشاكل الملتزمين والملتزمات بسبب التربية العقلية إن هو مش عقلى ، عشان كده هنبداً نتكلم فى حاجات يعنى ايه واحنا ماشيين كده تبع التربية العقلية وازاي

. نتعامل مع المشاكل

طيب قال تعالى آية 7 و8 و9 ركزوا معاً آية 7 عامله زى آية 9 بالظبط " وَالَّذِينَ آمَنُوا وَعَمِلُوا الصَّالِحَاتِ " دى بداية آية 7 وهيا بداية آية 9 " وَالَّذِينَ آمَنُوا وَعَمِلُوا الصَّالِحَاتِ " برده " وَالَّذِينَ آمَنُوا وَعَمِلُوا الصَّالِحَاتِ لَنُكَفِّرَنَّ عَنْهُمْ سَيِّئَاتِهِمْ وَلَنَجْزِيَنَّهُمْ أَحْسَنَ الَّذِي كَانُوا يَعْمَلُونَ " دى آية 7 ، طيب آية 9 " وَالَّذِينَ آمَنُوا وَعَمِلُوا الصَّالِحَاتِ لَنُدْخِلَنَّهُمْ فِي الصَّالِحِينَ " يبقى آية " وَالَّذِينَ آمَنُوا وَعَمِلُوا الصَّالِحَاتِ " وآية " وَالَّذِينَ آمَنُوا وَعَمِلُوا الصَّالِحَاتِ " وما بينهم " وَوَصَّيْنَا الْإِنْسَانَ بِوَالِدَيْهِ " يبقى الوالدين جاءوا أول فتنة ، وجاءوا ما بين " وَالَّذِينَ آمَنُوا وَعَمِلُوا الصَّالِحَاتِ "

طيب ليه قبلها " وَالَّذِينَ آمَنُوا وَعَمِلُوا الصَّالِحَاتِ " وبعدها " وَالَّذِينَ آمَنُوا وَعَمِلُوا الصَّالِحَاتِ " ؟

السبب الأول : لأن فتنة الوالدين بالذات فتنة الأم والأب لو قلبوا على ابنهم أو بنتهم يبشلوا له حياته ليه ؟ لأن أصحابي هيضابقوني هغير محمولي.. هعمل ودن من طين وودن من عجين ..ههود من الشارع أول ماشوف صاحبي جاي من بعيد، إنما أمي وأبوي هروح منهم فين؟؟ ده دول فى البيت ده ربنا سماه سكن طب هروح فين؟

و فى نفس الوقت بتبقى الحرب شعواء ليه ؟ لأن كل العاطفة الحب اللى فى قلبهم بيحاربو التزام ابنهم لأنهم خافين عليه فأول حاجة لأن لو مافيش زاد كبير أوى من الايمانيات والعمل الصالح والملتزم لو أمه . وأبوه حبوه هيبهلوه وهيتشل وهيقف فجاء قبلها آمن واعمل وبعدها آمن واعمل

فأول حاجة لأن لو مافيش زاد كبير أوى من الايمانيات والعمل الصالح الملتزم لو أمه وأبوه حاربوه . هيبهلوه وهيتشل وهيقف فجات قبلها امن واعمل وبعدها امن واعمل ايه أعمال صالحة

السبب الثاني أو الحاجة الثانية إن أنت يعني في مثل هذه الفتن الصعبة لن تثبت إلا لو شحنت شحناً عظيماً فتنة صعبة مش هيثبت فيها غير اللي هيتشحن يبقى مش حل الوالدين إن أنا اسمع كلامهم وإن أنا ابطل دروس وابطل سماع شرايط وابطل صحبة ملتزمين أنت لو عملتي الكلام ده أنت معتيش هتكون ملتزم أصلاً أنت كام ملتزمة سمعت كلام أهلها في الكلام ده وضاع التزامها وبيعوتوا دلوقتي مشاكل مش عارفة ارجع زى ما كنت ما أنتي اللي سمعتي أنتي مين قالك إن ده بر الوالدين أنتي هكذا ضررتي أمك وعققتي ربك لا بر الوالدين الذي لا تعقي فيه دينك يبقى الحاجة الثانية إن مافيش ثبات إلا لو في شحن عالي يبقى يا جماعة مواجهة مشاكلنا من غير عبادة مش هتنفع مواجهة مشاكلك ومعوقات الالتزام اللي . في طريقك من غير حضور دروس وصحبة صالحة مش هتنفع

الحاجة الثالثة إن يعني قبل الفتنة قبل فتنة الوالدين آمنوا وعملوا الصالحات طب بعد فتنة الوالدين آمنوا وعملوا الصالحات ازاي تخرجي من الفتن زى ما دخلتها ازاي الفتن متهدش دينك ازاي تخرج منها زى ما دخلتها متدين ملتزم ازاي مشاكل الملتزمين ومصاعب مشاكل الملتزمين دي متأثرش علي دينك وعلي التزامك .

يبقى دي ثلاث حاجات في ليه قبلها امنوا وعملوا الصالحات وليه بعدها امنوا وعملوا الصالحات

طيب تعالوا بقي لما نمسك الايات { وَالَّذِينَ آمَنُوا وَعَمِلُوا الصَّالِحَاتِ لَنُكَفِّرَنَّ عَنْهُمْ سَيِّئَاتِهِمْ وَلَنَجْزِيَنَّهُمْ

أَحْسَنَ الَّذِي كَانُوا يَعْمَلُونَ } يعني إيه { وَلَنَجْزِيَنَّهُمْ أَخْسَنَ الَّذِي كَانُوا يَعْمَلُونَ } كلمة عالية أوي يعني يعني سنجازيهم علي كل عمل بأحسن مستوي وصلوا ليه بتعبير ابن عاشور " لنجزينهم عن جميع صالحاتهم جزاء احسن صالحاتهم " يعني إيه يعني أنتي قمتي ألف ليلة بإذن الله طبعاً يعني بإذن الله سبحانه وتعالى أعلي ليلة قميتها فيهم اللي بكيتي وتوسلتي وتضرعتي وطولتي وسجدتي وقمتي ورتلتي أعلي ليلة فيهم تتحاسبي إن الألف ليلة هما دول كلهم بخشوع هذه الليلة ازاي دا دا يا ندمك بقي يا ندمك ساعتها لو كنتي ملقتيش قلبك في قيام الليل فسبتيه لإنك مش لاقيه قلبك وأنتي مش عارفة إن كل ليلة مكتيش لاقيه فيها قلبك كنتي هتتحاسبي بين إيدين ربنا عليها بمستوي أعلي ليلة لقيتي فيها قلبك يا ندمه اللي ساب جلسة الضحي لأنه مش لاقى قلبه فيها لما يكتشف يوم القيامة إن ألف جلسة ضحي منتش لاقى قلبك فيها كنت هتأخذ عليها ثواب ألف جلسة أعلي جلسة ضحي فعدتها فيها ونزلت من عينك دمة من خشية ربنا وأنت بتذكره هتأخذ ثواب الألف علي ثواب هذه يا ندمه اللي ساب العمل الصالح لأنه ملقاش قلبه فيه يا ندمه اللي ماشي ورا قلبه لقيت قلبى في القيام أقوم ملقتش قلبى اسبىه ، لقيت قلبى في الصيام

أصوم ملقتش قلبى اسبىه وفي النهاية هتلاقى راح عليك ثواب مهول " وَلَنَجْزِيَنَّهُمْ أَخْسَنَ الَّذِي كَانُوا يَعْمَلُونَ "

وَوَصَّيْنَا الْإِنْسَانَ بِوَالِدَيْهِ حُسْنًا " هما ببحاربوني وربنا بيوصيني عليهم هو ده الدين يا جماعة ووصينا الإنسان " بوالديه في ناس تقولك ايه ووصي الله الابن بوالديه ولم يوصي الوالدين بالابن الكلام ده غلط يا جماعة ربنا وصي الوالدين بالابن قال تعالى "يُوصِيكُمُ اللَّهُ فِي أَوْلَادِكُمْ" اه ده بعدها "لِلذَّكَرِ مِثْلُ مِثْلِ الْأُنثَيَيْنِ" طب ما تأخذ عموم الجملة وبعد كذا خصصها يعني "يُوصِيكُمُ اللَّهُ فِي أَوْلَادِكُمْ" خدها علي العموم ثم التخصيص في مسألة الميراث "يُوصِيكُمُ اللَّهُ فِي أَوْلَادِكُمْ" الأم والأب متوصيين بولادهم في دينهم وتربيتهم والابن متوصي بامه وابوه "وَوَصَّيْنَا الْإِنْسَانَ بِوَالِدَيْهِ" الباء هنا باء المصاحبة يعني لازم أمك وأبوك دول بيقو أصحابك أصحابك تعيش معاهم وتقوم تجيب الهدوم من عالسيل وتقوم جاب البناتيل بتاع والدك كاويها من غير ما هو يطلب وتقوم بالليل جاب الجازمتين بتوعه ملمعهمله يصحي يلاقيهم متلمعين وتقومى تحطى الغسيل في الغسالة والدتك تصحى تلاقي الغسيل خلص وتقومى تنضفى الشقة ، وتقوم أنت داخل المطبخ مشطب المواعين احنا كنا بنعمل كذا واحنا ملتزمين في الكلية لأهلينا نعمل كذا وتقوم الكلام ده اعمله ازاي بر وأول ما أبوك يقول حاجة وأنت في عز النوم كان منا والله يا جماعة اللي كان أبوه يناديه يعني يقول سمعنا وأطعنا وهيموت مش قادر عايز ينام ولكن هو مستشعر إن الذي يناديه هو الله مش أمه وأبوه سمعنا وأطعنا أنزل هات عيش حاضر خدام خدام لأمي وأبوي وخدام متطوع وخدام متفاني ومن قبل ما يطلبوا الطلب أنا إيه بعملهم كل حاجة وبصاحبهم وبتكلم معاهم مش بعد ما تتجوز تزور والدتك بيقى معاد الساعة الكتيبة بقي اللي أنت بتعملها أداء واجب ، قاعد مع مراتك ترغوا في كل موضوع وتروح لأمك وأبوك تقعد بقي إيه الصمت يطلع عليك ومنتش لاقى موضوع لا اتكلم وارغى وناغشهم وناكشهم وهات . كلام وافتح مواضيع وأقعد لحد ما بيقو صاحبك وتبقى صاحبهم

وَوَصَّيْنَا الْإِنْسَانَ بِوَالِدَيْهِ حُسْنًا " طب ما معني كذا يا عم الشيخ إن أنا أضيع ديني .. لبييه !! مهما بيقولولي " متحضرش الدروس وما تصاحبش اللي أنت مصاحبهم الأثنين دول يا حبيب قلبي لو أنت سمعت فيهم كلام أمك وأبوك أنت ضعت يعني أنتي عارفة لو قالوك انتقبي متتنقيش وأنتي اتاخرتي شوية في النقاب يعني إن شاء الله تتحل لأن فيه أبواب عباده تانية ممكن تعيدي ربنا بيها علي ما ربنا يفتحك باب حجاب أمهات المؤمنين إنما ما تصاحبش الصلبة الالتزامية ومتحضرش الدروس في المسجد الأثنين دول عليه العوض ومترحش تحفظ القرآن مع الصلبة اللي أنت بتحفظ معاهم أم صاحب اللي بتحفظ معاه يبقى أنت كذا ضعت .

علشان كذا يا جماعة "وَوَصَّيْنَا الْإِنْسَانَ بِوَالِدَيْهِ حُسْنًا" مش إحسان في فرق بين الإحسان والحسن في فرق بين الإحسان والحسن الإحسان لا يحتمل إلا القبول يعني لما يطلب منك لا يحتمل إلا القبول ، إنما الحسن أنا ممكن أقول لا بس بجمال الحسن فيه جمال يعني إيه الإحسان مهما طلبوا منك في الدنيا أحسن إليهم إنما الحسن افرض طلبوا منك طلب في الدين حرام لا يبقى علشان كذا ربنا بيقول إيه "وَأِنْ

جَاهِدَاكَ" هيلوعوا البيت نار عليك هيعملوها حريقة هيعملوها حياة أو موت "وَأِنْ جَاهِدَاكَ" بس اللي هيتقتل في المعركة دي دينك خافي علي دينك "وَأِنْ جَاهِدَاكَ" يعني نار يا جماعة نار "لِئُشْرِكَ يِي" العاقبة إنك أنت خلاص تسبب الطريق "مَا لَيْسَ لَكَ يِهْ عِلْمٌ" ربنا اللي قالك تعصي الوالدين وبرهم وبيقولك هنا مطعمهمش مضيعش دينك لما الغلام راح للراهب فأهله بدأوا يضربوه يضربوا الغلام الراهب قاله ايه إذا أتيت أهلك فقل حبسني الساحر وإذا أتيت الساحر فقل حبسني أهلي طيب ماهو كذا بيكدب طب ما البديل إن دينه هيضيع يعني ممكن حتي يعرض أنا نازل رايح درس وهما ممكن فاكرين درس ديني ولا دنيوي وأنا نازل درس إيه ديني أنا نازل اذاكر مع صحابي وممكن هيذاكر علم شرعي وهما فاكرين إنه هيذاكر علم دنيوي إنما الراهب مقلوش متجليش ليه لإنه لو مجالوش كان دينه ضاع مكنش كمل من غير مربى من الصحة من غير الدروس من غير محفظ قرآن هذه الشخصيات كل واحد منكم وكل واحدة منكم غيابه في حياته . معناه إن في عمود من عواميد عمارة الدين في حياتك وائ

لازم كل واحد منكم يبقى في حياته محفظ قرآن مربى صحة داعية بيحضره الدرس بتاعه لازم يبقى يبقى كل واحد منا في حياته هذه الآية هذه الأدوار "وَأِنْ جَاهِدَاكَ لِئُشْرِكَ يِي مَا لَيْسَ لَكَ يِهْ عِلْمٌ" فلا تطعهما في الدين لا في الدين لا دا لو قالك متصليش السنن متسمعش كلامه لا ليه لإن ده ربنا ده ملوش دعوة يا جماعة ده منهج حياة ملوش دعوة بالبر والعقوق البر اخدمهم اكويلهم اغسلهم انضفلهم اعمل خدي مداس ليهم يشتموني واسكت دا البر إنما البر انقطع عن الدين اقطع الحبلى السري اللي بيني وبين الدين هذا ليس هو البر "فَلَا تُطْعِمَاهُمَا إِلَيَّ مَرْجِعُكُمْ فَأَتِبْنِكُمُ يَمَا كُنْتُمْ" ايه "فَأَتِبْنِكُمُ يَمَا كُنْتُمْ تَعْمَلُونَ" "فَأَتِبْنِكُمُ يَمَا كُنْتُمْ تَعْمَلُونَ"

يبقى هنا احنا وقفنا مع لفظ جَاهِدَاكَ وقفنا مع لفظ صَاحِبَهُمَا وقفنا مع لفظ فَلَا تُطْعِمَاهُمَا وقفنا مع الباء في يَوَالِدَيْهِ يعني كل دي دلالات علي عظمة البر وفي نفس الوقت مع إيه مع عدم تضيع دينك

عظمة البر أظن الكلام اللي أنا قلته كلام واضح متشيليش في نفسك بقي لما والدتك تقول هدعي عليكى وأنتي النقاب اللي أنتي جيتهولنا وربنا هينتقم منك كل ده الله لا يستجيب له ليه لإن هي بتحاريك في دينك كذا طيب في نفس الوقت خلاص يبقى أمي وأبوي ببحاريوني في ديني لا .. وَصَاحِبَهُمَا فِي الدُّنْيَا مَعْرُوفًا ، لا .. "وَوَصَّيْنَا الْإِنْسَانَ بِوَالِدَيْهِ حُسْنًا" دا دول كفرة فما بالك بالمسلمين ولكن خافين دا دول كفار وربنا قال "وَوَصَّيْنَا الْإِنْسَانَ بِوَالِدَيْهِ حُسْنًا" يبقى إذن يجب البر ولكن نفهم إن البر مش في منهج الحياة ، البر مش في النقاب ، البر مش في اللحية ، البر مش في صلاة الجماعة ، البر مش في حضور درس .. طيب دلوقتي بقيت أنا هعمل كذا طيب افرض بقي أدى إلى صدام لا لازم تعرض يعني دايمًا أقول لإخواني اللي له صاحب صالح خايف علي إنه يفقده ميكلمش أهله في البيت عنه مترجعيش بقي البيت يا ماما أنا صحبتي مثلاً مروة ملتزمة ومتدينة ويعني أول ما والدتك تضايق منك مروة دي تقاطعها ليه لأنها هتحسن إن هي بقي اللي شداكي في الدين وهي ، انت مثلاً صاحبك مثلاً محمد ده د محمد ده ماشاء الله يا بني متكلمش عنه لما يكون في شيخ أو مربى ربنا رزقهولك متكلمش عنه في بيتك أنا بقول للإخوة المجوزة مش الإخوة اللي مع أمها وأبوها أقولهم أما يكون في أخ أنت شغال معاه في الدعوة كثير متجبش سيرته في البيت علشان مينفسنوش منه يقولو هو ده اللي واحد منا فلان يعني يا جماعة اتعلموا الحياة

يبقى فيه حاجة في العلاقة بالوالدين اسمها التعريض أنا نازل احضر درس أنا نازل اذاكر اسمها التعريض في حاجة ولون حديث الغلام كان فيه كذب يعني الراهب قاله اكدب إنما احنا هنقول هنا التعريض اللي فيه حاجة تانيه اسمها ال ايه عدم ذكر الصحة في البيت يعني عارفين لما واحد يكون متجوز واحدة ومبسوط منها يروح لوالده دا ماشاء الله دا فلانه دي بسطاني أمه تقوم غيرة منفسنة تقوم مولعة حريقة عليه يا ابني متشكرش في مراتك قدام والدتك متجبش سيرة مرات قدام والدتك متضايق من مراتك ماشي طلع ضيقك من مراتك إنما مبسوط منها اوعي تقول إنها بسطاك أو إنها طبخالك حلو ليه لإنك بتستثير نفسية اللي قدامك واخدين بالكم معايا

- يبقى في حاجة اسمها مجيش سيرته مجيش سيرت صاحبك اللي شغال معاك في الدعوة قدام مراتك .
- رقم اثنين مجيش سيرة مراتك قدام والدتك .
- رقم تلاته مجيش سيرة المربي بتاعك والصحية الصالحة بتاعتك قدام والدك ووالدتك .

فهمتوا التلات قواعد دول خليكم هطبقوا الله يعينكم دا دي حكمة اللي مش هطبقها إن شاء الله بإذن الله هيتعلم بس بخبرة الأيام بقي هيتعلم بس لما ايه لما يدوق بقي يبقى يبقى إذن في حاجة اسمها متكلمش بحيث إن ايه مش اه نازل اه دا زمانه راح لفلان هو عنده غيره دا زمانه دي زمانها قاعدة مع فلانة هي عندها غيرها لا يبقى لازم احتسب للأيام اللي جايه طيب وفيه ايه ثاني مع الوالدين

في حاجة تالته اسمها عدم التأثير النفسي بموقفهم من الدين يعني ايه ؟ يعني هما دلوقتي يحاربوك في التزامك ها يحاربوك بإيه ؟ هما فاهمين إن بر الوالدين ده حته قوية قوي في الدين فيبدأوا بقي يحاربوك . بيها أنت كدا عاق مش راضيين عليك هو ده الدين هو ده البر بص كل ده ماهواش الموضوع

طب النقطة الرابعة أريضهم بقي إيه فيما يحبونه يعني متخليهاش كلها كدا كروهاش خلي حته بمبي . ايه ما يحبونه ؟ إنك تخدمهم وتتفاني في خدمتهم وتبلي طلبهم بعد فترة يكتشفوا إن أنت أطوع واحد ليهم والحاجة الثانية في المذاكرة في المذاكراتك أنت ، بقول للإخوة دايمًا اللي عندهم مشاكل مع أهاليهم ذاكروا في الصالة يقولي مش عارف أقوله يا ابني ذاكر في الصالة يا ابني ثبت ساعتك كدا تقعد في الصالة كدا حتي لو متناش مركز أقعد بس في الصالة أريضهم خلي الساعتين دول بر والدين يعني يبقى . يحتوي لو 70% تركيز يبقى اعمل اللي هما يحبونه بقي برهم في البر الحقيقي خلاص

الحاجة الخامسة اصبر لو اتحاربت اصبر يعني كل التيار الاسلامي اتحارب ولكن في النهاية يعني ربنا سبحانه وتعالى يفتح علي اد ايه علي اد الصبر دي بعض الحلول العملية في قضية بر الوالدين غير حته

الدعاء والاجتهاد في الدعاء وزى ما قتلتم عدم التأثير النفسي بكلامهم إن متخافش ربنا مش غضبان عليك متقلقيش ربنا مش غضبان عليك متقلقيش بس أريضهم في البر الحقيقي في البر الحقيقي في أمور الدنيا .

رقم 7 بقي و8 اللي هو دعوتهم إن متنسوش حته الدعوة إلى الله معاهم متنسوش مسألة الدعوة إلى الله معاهم وفرج ربنا يعني بيجي في اي وقت الكل ربنا يفرجها عليه ولكن الصبر يا إخواني في الله

"طيب الآية اللي بعدها "وَالَّذِينَ آمَنُوا وَعَمِلُوا الصَّالِحَاتِ لَنُدْخِلَنَّهُمْ فِي الصَّالِحِينَ"

في فرق بين كلمة عملوا الصالحات وبين كلمة الصالحين الصالحين اللي وصلوا الذين صلحوا لجوار الله في الفردوس الأعلى أmaal عملوا الصالحات لا مش كل واحد عمل الصالحات وصل وبقي صالح ممكن وحدة بتعمل الصالحات وقلبيها مليون شهوات وشبهات وعندها مشاكل وبقي عملوا الصالحات معناها إنه ماشي علي الطريق إنما الصالحين اللي وصلوا فربنا قال هنا بشري مهولة يا جماعة قال وَالَّذِينَ آمَنُوا وَعَمِلُوا الصَّالِحَاتِ اللي مات علي الطريق وموصلش لندخلهم في الصالحين هعامله معاملة اللي وصل يا ربيبي

طيب البشري المهولة دي جات بعد آية الوالدين ليه ؟ عشان حاجتين

الحاجة الأولانية إن الوالدين دول أحب ناس إليك في الدنيا فلما خسرتهم بسبب دينك لما خسرتهم . بسبب دينك فرينا قال جزاء من جنس العمل أنت خسرت أحبابك بسبب الالتزام هعوضك أحباب أشد حباً ليك منهم يبقى لَنُدْخِلَهُمْ فِي الصَّالِحِينَ هعوضك الأنس الوحشة اللي أنت لقيتها بسبب إن الأحباب سابوك هعوضك بيها أنس يبقى جزاء من جنس العمل

• طب

والمعني الثاني المعني الثاني يا جماعة ده معني مهول يعني أنا لو كنت فاهمة أيام الكلية اعتقد إن يعني اعتقد إن اللي هيفهمه هيفرق معاه كثير قوي إن دلوقتي لما تلاقي والدك ووالدتك مشاكل وتعارض بين الدراسة والمشاكل والدنيا والفتن والشهوات القديمة تلاقي كل ده فأنت في النهاية بعد كل ده أنت سرعتك في الطريق إلى الله بقيت بطيئة أنت تتخيل بقي لو كان مثلاً والدي ووالدتي مش معارضني دا أنا كان زمني طلقة لو كان مغيث مشاكل دا أنا كان زمني طلقة دا أنا لو مكنتش في دراسة دا أنا كان زمني طلقة فأنت شايف إن المعوقات دي معطلاك فكان ربنا بيقول ابشروا يا جماعة المعوقات دي بتبطئ سرعتك في الطريق بدل ما كنت هتمشي بسرعة 200 كيلو في الساعة ماشي علي سرعة 20 كيلو ولكن مجرد إنك علي الطريق لو مت وأنت عليه هتعامل معاملة اللي وصل المهم إنك علي الطريق علشان كذا يا ندمه يا ندمه اللي ساب الطريق بسبب إنه محبط وبسبب إنه قال أنا مش هقدر أوصل فقام . سايب الطريق

أنا دلوقتي قلت يا ندمه مرتين مرة من آية 7 ومرة من آية 9 يا ندمه من آية 7 يا ندمه اللي ساب عمل صالح لإنه قال مش لاقى قلبي لما بييجي يوم القيامة يلاقي ربنا كان هيجزيه بكل الأوراد اللي عملها ومش لاقى قلبه فيها بأجمل ورد مرة عمله في يوم من الايام كان لاقى قلبه فيه يا ندمه وكان يا ندمه اللي ساب الطريق بسبب إنه أحبط وقال مش هقدر أوصل ومش هقدر أعمل حاجة يا ندمه يا ندمهم يا جماعة

يعني دي آيات حاولنا إن احنا نتناول النهاردة أول مشكلة في موسوعة مشاكل الملتزمين وهي مشكلة وهي مشكلة الوالدين إن شاء الله بإذن الله المرة الجاية بقي من أول "وَمِنَ النَّاسِ مَن يَقُولُ آمَنَّا بِاللَّهِ" يبقى دي إن شاء الله بإذن الله لقاء 7 بقي من أول لقاء 7 بقي القادم بإذن الله إن شاء الله بإذن الله من أول "وَمِنَ النَّاسِ مَن يَقُولُ آمَنَّا بِاللَّهِ فَإِذَا أُوذِيَ فِي اللَّهِ جَعَلَ فِتْنَةَ النَّاسِ كَعَذَابِ اللَّهِ" الشعار بتاعنا المرة الجاية بإذن الله سبحانه وتعالى "وَلْيَعْلَمَنَّ اللَّهُ الَّذِينَ آمَنُوا وَلْيَعْلَمَنَّ الْمُنَافِقِينَ" الشعار بتاعنا المرة الجاية بإذن الله سبحانه وتعالى "وَلْيَعْلَمَنَّ اللَّهُ الَّذِينَ آمَنُوا وَلْيَعْلَمَنَّ الْمُنَافِقِينَ" ده الشعار بتاعنا في الجولة بتاعتنا المرة الجاية إن شاء الله واحنا بنتكلم عن باقي موسوعة مشاكل الملتزمين إن شاء الله يا جماعة عايزين يعني نشد حيلنا كذا الوقت المفروض إن أنا معابا طلبة وطالبات سنة تانية وسنة أولي زائد بعض إخوانا اللي مش معانا في المعهد أتمني إن احنا نشد حيلنا